

Այդ միջոցին բակում յայտնուեցաւ մի այլ ստոեր, նա ցած իջաւ կտուրից, եւ լսեցի նրա ոտնաձայնը: Արագ քայլերով մտաւ նա սրահը: Ես իսկոյն ճանաչեցի Ծովիկին: Տեսնելով մօրը ինձ մօտ, բացականչեց նա.

– Ա՛խ, աստուած, այդ ո՞վ բաց արաւ դուռը:

Երեւում էր, որ նա կտուրից լսել էր մօր ձայնը եւ ցած էր իջել նրան օգնելու: Նա բռնեց գիշերաշրջիկ լուսնոտի ձեռքից եւ, առանց մի խօսք ասելու, տարաւ դէպի իր սենեակը: Մայրը առանց ընդդիմութեան հետեւեց նրան: Մի ուրիշը նրա տեղ՝ կարող էր վախենալ, կարող էր աղաղակել, բայց մանկահասակ աղջիկը, որպէս տեսնում էի, բոլորովին ընտելացած էր մօր հիւանդութեանը եւ գիտեր, թէ ինչպէս պէտք էր վարուել նրա հետ: Երբ նա տարաւ, հանգստացրեց մօրը եւ դուռը կողպելով եկաւ ինձ մօտ՝ ես նրանից հարցրի.

– Զո մօր հետ ամէ՞ն գիշեր այդպէս է պատահում:

– Երբեմն միայն, – պատասխանեց նա տխուր ձայնով, – ավելի լուսընկայ գիշերներում: Այդ ժամանակ հայրս միշտ նրա մօտ է լինում, հսկում է նրան: Ա՛խ, ո՞ր է գնացել այս գիշեր, չէ երեւում:

– Նա, կարծեմ, հիւսնի արհեստանոցումն է:

Ծովիկը դիմեց դէպի արհեստանոցը՝ հօրը կանչելու համար:

– Սպասի՛ր, միասին գնանք:

Նա կանգնեց: Ճանապարհին հարցրի նրանից.

– Զո մայրը ինչ-որ արեան վրայ էր խօսում: Այդ ի՞նչ արիւն է:

– Չեմ իմանում, նա միշտ այդ է ասում, երբ նրա հետ պատահում են այսպիսի բաներ... Հայրս չէ թողնում, որ մենք լսենք, նա մեզ հեռացնում է...

– Դու եւ. Զորթօթը չէ՞ք վախենում, երբ նա այդպէս բաներ է խօսում:

– Ինչո՞ւ պէտք է վախենանք: Նա մեր մայրն է: Բայց հարեւանները վախենում են, ասում են, թէ դեւերը ման են ածում նրան:

– Նա մի՞շտ այդպէս խօսում է:

– Շատ անգամ ոչինչ չէ խօսում, լուռ դուրս է գալիս սենեակից, պտտւում է բակի մէջ, մտնում է պարտեզը, յետոյ գնում է ծովեզրը: Այնտեղ ժամերով կանգնում է եւ երկար, անխօս նայում է ծովին:

Իսե՛ղճ աղջիկ, եթէ նա գիտենար, թէ որպիսի ցաւեր են թաքնուած դժբախտ մօր սրտում: Ես ոչինչ չասեցի: Մենք մօտեցանք հիւսնի արհեստանոցին: Ասլանը նստած էր ճրագի մօտ, իսկ նրա հանդէպ՝ ծերունի արհեստաւորը: Երկուսի մէջտեղում դրած էր մի լայն տախտակ, որ ծառայում էր սե-